



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. _____, Datë _____.____.2026

**“PËR
PËRCAKTIMIN E KRITEREVE, PROCEDURAVE PËR PËRZGJEDHJEN E
ANËTARËVE, FUNKSIONIMIN, SI DHE MËNYRËN E USHTRIMIT TË
PËRGJEGJËSIVE TË KOMISIONEVE KËSHILLIMORE PËR TITUJT E NDERIT”**

Në mbështetje të nenit 100 të Kushtetutës dhe të pikës 4, të nenit 14, të Ligjit nr. 94/2022, “Për titujt e nderit dhe titujt vendorë të nderit në Republikën e Shqipërisë”, me propozimin e ministrit të Punëve të Brendshme, Këshilli i Ministrave,

VENDOSI:

Miratimin e rregullave për kriteret, procedurat për përzgjedhjen e anëtarëve, funksionimin, si dhe mënyrën e ushtrimit të përgjegjësive të komisioneve këshillimore.

I. PËRBËRJA E KOMISIONIT KËSHILLIMOR

1. Institucionet përgjegjëse për dhënien e titujve të nderit ngrënë Komisionin Këshillimor për Titujt e Nderit, në vijim “Komisioni Këshillimor”, për të shqyrtuar paraprakisht nismat për dhënien e titujve të nderit, të cilat jepen në zbatim të ligjit nr. 94/2022, “Për titujt e nderit dhe titujt vendorë të nderit në Republikën e Shqipërisë”.
2. Komisioni Këshillimor përbëhet nga 5 (pesë) anëtarë, prej të cilëve 3 (tre) anëtarë të jenë punonjës nën varësinë e institucionit përgjegjës për dhënien e titullit dhe 2 (dy) anëtarë personalitete të jashtme.
3. Komisioni Këshillimor ngrihet me urdhër të titullarit të institucionit përgjegjës për lëshimin e titullit të nderit. Anëtarët personalitete të jashtme, përzgjidhen nga radhët e personaliteteve të njohura që kanë dhënë kontribut në fushat përkatëse.
4. Anëtarët personalitete të njohur të fushës që përzgjidhen për të qenë anëtarë të Komisionit Këshillimor marrin shpërblim në shumën 15.000 lekë për çdo procedurë shqyrtimi. Shpenzimet përballohen nga buxheti i institucionit përgjegjës për lëshimin e titullit.

II. ORGANIZIMI DHE FUNKSIONIMI

1. Komisioni, në mbledhjen e tij të parë, zgjedh me shumicë votash Kryetarin. Detyra e sekretarit të Komisionit Këshillimor kryhet nga një punonjës i administratës të institucionit, sipas përcaktimit në urdhrin për ngritjen e këtij komisioni.
2. Veprimtaria e Komisionit Këshillimor i nënshtrohet rregullave në fuqi për mënyrën e funksionimit të organeve kolegjiale. Vendimet merren me shumicën e votave të të gjithë anëtarëve.
3. Anëtarët e Komisionit Këshillimor të pranishëm në mbledhje nuk mund të abstenojnë.

4. Gjatë veprimtarisë së tyre anëtarët e Komisionit Këshillimor i nënshtrohen legjislacionit mbi parandalimin e konfliktit të interesave.
5. Komisioni Këshillimor ngrihet për çdo nismë, kryesisht ose me propozim, që i paraqitet institucionit përgjegjës për lëshimin e titullit të nderit jo më vonë se 60 (gjashtëdhjetë) ditë përpara datës së caktuar për nderim.
6. Mbledhja e parë e komisionit zhvillohet jo më vonë se 5 (pesë) ditë nga ngritja e komisionit.
7. Në mbledhjen e parë komisioni njihet me objektin e veprimtarisë dhe shqyrton dokumentacionin që shoqëron praktikën.
8. Në çdo mbledhje mbahet procesverbal, në të cilin pasqyrohen data dhe vendi i mbledhjes, anëtarët që marrin pjesë, çështjet që diskutohen, vendimet e marra dhe rezultati i votimeve.
9. Procesverbal i mbahet nga sekretari dhe i paraqitet për miratim dhe nënshkrim të gjithë anëtarëve në fund të mbledhjes ose në fillim të mbledhjes pasardhëse.
10. Komisioni Këshillimor shqyrton dhe jep mendim për:
 - a) plotësimin e kushteve dhe kritereve ligjore formale nga kandidaturat e propozuara për titullin e caktuar të nderit;
 - b) të dhënat biografike të kandidatëve që mbështesin meritën për përfitimin e titullit të nderit;
 - c) të dhënat biografike, nëse ka, të cilat i kundërvihen meritës;
 - ç) motivacionin që duhet të shoqërojë dhënien e titullit të nderit për kandidatët e propozuar.
11. Komisioni Këshillimor harton raport për çdo kandidaturë që shqyrton dhe përpilon rekomandim me shkrim për dhënien ose jo të titullit të nderit. Rekomandimi i Komisionit Këshillimor nuk është detyrues për institucionin përgjegjës për dhënien e titujve të nderit.
12. Komisioni Këshillimor, pasi merr praktikën që përmban propozimin ose nismën, i kërkon me shkresë Autoritetit për Informimin mbi Dokumentet e ish-Sigurimit të Shtetit (Autoriteti i Dosjeve) informacion lidhur me ekzistencën në dokumente të ish-Sigurimit të Shtetit të informacioneve për kandidatin. Përgjigjja e Autoritetit të Dosjeve jepet sipas përcaktimeve të pikës 2, të nenit 29 të ligjit nr. 45/2015, "Për të drejtën e informimit për dokumentet e ish-Sigurimit të Shtetit të Republikës Popullore Socialiste të Shqipërisë", të ndryshuar".
13. Kur përgjigjja nga Autoriteti i Dosjeve vjen negative për kandidatin, Komisioni Këshillimor vijon procedurat për shqyrtimin e praktikës. Kur Autoriteti i Dosjeve konfirmon ekzistencën në dokumente të ish-Sigurimit të Shtetit të informacioneve për kandidatin, komisioni nëpërmjet Sekretarit të Përgjithshëm informon titullarin e institucionit për konstatimin e papajtueshmërisë. Në këtë rast praktika arkivohet pa veprime të mëtejshme.
14. Në rastet kur praktika është mbështetur në propozimin e institucioneve me të drejtë ligjore propozimi, komisioni shqyrton nëse propozimi është depozituar sipas afatit minimal 90 (nëntëdhjetë) ditë kalendrike përpara datës së propozuar për dhënien e titullit dhe, në rast se ky afat nuk është respektuar, shqyrton nëse janë paraqitur shkaqe objektive ose të justifikueshme, të cilat lejojnë trajtimin e praktikës si rast përjashtimor pa cenuar kryerjen e rregullt të procedurës deri në datën e propozuar për akordimin e titullit të nderit. Gjithashtu, komisioni verifikon nëse dokumentacioni i propozimit plotëson kërkesat lidhur me përmbajtjen, sipas përcaktimeve të pikës 2, të nenit 13 të ligjit nr. 94/2022.
15. Në varësi nga konstatimi, Komisioni Këshillimor vendos:

- a) të vijojë me shqyrtimin e nismës ose të propozimit;
 - b) t'i kërkojë institucionit që ka ndërmarrë nismën kryesisht ose institucionit propozues plotësimin e të metave të propozimit për nderim brenda 10 (dhjetë) ditëve;
 - c) t'i dërgojë institucionit përgjegjës për dhënien e titullit rekomandimin për mospranimin e propozimit, kur ai është paraqitur në një afat më të ngushtë se afati 90 ditor i ligjit dhe për vijimin e procedurës përtej afatit nuk janë evidentuar shkaqe justifikuese.
16. Komisioni Këshillimor, kur çmon se praktika duhet të plotësohet me të dhëna dhe informacione shtesë, krahas informacionit dhe dokumentacionit të paraqitur në nismën ose propozimin për nderim, kërkon informacione ose dokumentacion shtesë nga shtetasi i propozuar për nderim, si dhe nga çdo person fizik ose juridik apo organ publik, vendas ose i huaj, që disponon të dhëna të vlefshme për shqyrtimin e plotë të nismës ose të propozimit. Kërkesa përcillet zyrtarisht nga Sekretari i Përgjithshëm i institucionit. Në shkresën përcjellëse informohet edhe për afatin, si rregull 10 ditor, për të cilin komisioni mbetet në pritje të përgjigjes.
17. Në çdo rast komisioni çmon se cilat fakte konsiderohen të provuara bazuar në parimin e nderimit publik dhe të vlerësimit të kontributit, në vlerësimin e hollësishëm të informacioneve dhe dokumentacioneve në dispozicion, si dhe në rezultatin tërësor të shqyrtimit, duke hartuar për këtë qëllim raportin përkatës.
18. Komisioni Këshillimor shqyrton praktikën dhe dërgon mendimin për përmbushjen ose jo të kriterëve për nderim, si rregull brenda 30 (tridhjetë) ditëve nga marrja e vendimit për vijimin e shqyrtimit të propozimit ose nga plotësimi i të metave të tij. Procesi i shqyrtimit të nismës ose propozimit mund të shtyhet, me miratimin e titullarit të institucionit, përtej afateve të përcaktuara për shkak të rrethanave të paparashikuara, që dëmtojnë reputacionin dhe vlerën e aktit të nderimit në opinionin publik, deri në sqarimin e këtyre rrethanave.
19. Në përfundim të shqyrtimit, komisioni i dërgon institucionit përgjegjës për dhënien e titullit mendimin e arsyetuar për:
- a) miratimin e nismës ose propozimit;
 - b) refuzimin e nismës ose propozimit për shkak të mosplotësimit të të metave brenda afatit 10-ditor (dhjetëditor) ose për shkak të mospërmbushjes së kriterëve sipas këtij ligji.
20. Efektet financiare të këtij vendimi përballohen nga buxheti i institucioneve përgjegjëse për dhënien e titujve të nderit.

Ky vendim hyn në fuqi 15 ditë pas botimit në Fletoren Zyrtare.

KRYEMINISTRI

EDI RAMA